

Jo-Rumi

JANDIKO: Jaote Paulo

KAR NDIKO: Korintho

KINDE NDIKO: 58 kata 59 E YIK RUOTH (AD)

Gik Manie Iye

Paulo neni Korintho e wuodhe mar tero injili maradek kendo nochano kaka dodhi Rumi, kata obedo ninepok odhi kuno nyaka nene. Nondikonegi baruwani konyisogo kanisa ni en ng'a kendo konyisogi e yo machuok weche mane opunjo mag muma. Mae e baruwa ma Paulo ondiko manenore moiere maloyoe barupene mamoko. Ochake konyisogo kaka ji duto gin joricho. Kuom mano dhout ogendini kata jo-Yahudi onge gi ratiro moro amora kuom Nyasaye nikech richo osemayogi ratirono, mak mana Nyasaye mang'eny gi miwafu kane pod wan joricho nolosonwa yo mwadok godo ire 5:8. En ema wanyalo yudoe ngima man kod loch kaka jo-Kristo. Bang'e Paulo puonjo kuom chenro mar Nyasaye kuom Jo-Yahudi 9-11, kendo otieko gi puonj moko mag siem kuom tim.

THORRO

Tim makare mar Nyasaye, kaka otiyo gipiny kod adiera, chenro makare mar waruok, magi e puonj manie kitabuni. Nyasaye inyiso kaka ng'at maduong', kendo Nyasaye maler mar piny mangima, ok onyal mbeko chik nikech gia kuome. Kendo kaluwore gi chikego, noloso yo mar waruok machalre ni Jo-Yahudi, kaachiel gi dhout ogendini kane ooro Wuode koa e polo mondo othone richo mag piny. Omiyo koro ng'ato ang'ata moyie kuom Yesu noyud waruok 10:9, kendo yudo teko Nyasaye kuom richo, e ngimane. Kaluwore gi hera mar Nyasaye onge gima koro pogo ng'ama oyie kuome kode 8:38-39

WECHE MOCHAN KAE GIN:

1. Weche motelo 1:1-17
2. Richo kod waruok kuom yie man kuom Kristo 1:18-15:21
3. Loch kuom richo, e teko mar Kristo 6:1-8:39
4. Chenro mar Nyasaye kuom Jo-Yahudi 9:1-11:36
5. Kaka ngima gi dak Jakristo onego obedi 17:1-15:13
6. Weche mogik 15:14-16:27

1 An Paulo, misumba Yesu Kristo, mane oluongi mondo obed jaote, kendo mane owal ne Wach Maber mar Nyasaye, ²Wach Maber mane osingo chon e Ndiko Maler kotiyo gi Jonabi mage e mawuoyo ³kuom Wuode, mane en nyakwar Daudi kuom ringruok, ⁴kendo mane onyis ratiro gi teko ni en Wuod Nyasaye kuom chuny mar ler, nikech

chier mare koa kuom joma otho: Yesu Kristo Ruodhwa. ⁵Kuome kendo e nyinge ema waseyudoe ng'wono gi teko mar bedo joote, mondo wami Ogendini duto obed gi winjo wach mar yie. ⁶To un bende un e kanyakla achiel gi jogo moseluongi mondo ubed jo Yesu Kristo.

⁷Ne ji duto man Rumi, ma Nyasaye

ohero kendo oluongo mondo obed jomaler, ng'wono gi kuwe moa kuom Nyasaye Wuonwa kod Ruoth Yesu Kristo mondo obed kodu:

Paulo Ogombo Limo Rumi

⁸Mokuongo, aduoko erokamano ne Nyasacha, kuom Yesu Kristo nikech un duto, nimar yie maru ihulo e pinje duto. ⁹Nyasaye ma atiyone gi chunya duto, ka alando Injili mar Wuode, en janeno mara kaka asiko aparou kinde duto ¹⁰e lamo maga kendo alamo ni kabere to koro yo oyawrena mondo abi iru, ka Nyasaye oye. ¹¹Agombo nenou ahinya mondo apognue mich moko mag chuny mondo ategugo. ¹²tiende ni, mondo un kod an wajiwre ng'ato gi ng'ato e yie marwa, ka ajiwou to un bende ujiwa. ¹³Ok adwar ni ukiya, jowetena, ni asechano kuom ndalo mang'eny mondo abi iru (to osetama timo kamano nyaka koroni), mondo un bende aka cham e dieru mana kaka asewudo e dier ogendni mamoko. ¹⁴An jagop jo Grik gi joma ok jo-Grik, kendo mar joma riek kod joma ofuwo. ¹⁵Mano emomiyo aketo chunya ni nyaka un bende ayalnu Wach Maber, un ma un Rumi. ¹⁶Aonge wichkuot gi Wach Maber, nikech en teko mar Nyasaye ma waro ng'ato ang'ata moyie, mokuongo ni jo-Yahudi, eka bang'e ne Ogendni bende. ¹⁷Nikech kuom Wach Maber nogo ema Nyasaye ketoe dhano kare kuom yie kende ma ok omedie gimoro machielo, mana kaka ondiki ni, "Ng'at makare nobed mangima kuom yie."

Mirimb Nyasaye Kuom Dhano

¹⁸Mirimb Nyasaye koro fwenyore koa e polo kuom ji duto motamore lame, kendo matimo richo ka gigeng'o adiera gi timbe-gi maricho. ¹⁹Nikech gima dhano nyalo ng'eyo kuom Nyasaye oyangore negi malar, nikech Nyasaye osele negi. ²⁰Nikech nyaka chakruok piny, gii Nyasaye maok nenre kaka tekone mochwere kod kite, osenenore malong'o

ka gifwenyore e gik mosechweyo, mondo omi dhano kik riasre kuom weche machalo kamagi. ²¹Kata obedo ni ne ging'eyo Nyasaye, to ne ok gimiyie duong' kaka Nyasaye, kendo ne ok giduokone erokamano, to pachgi nobedo manono kendo chunyi mofuyo nodinore. ²²Kata obedo ni ne giwacho ni giriek, to ne gibedo joma ofuwo, ²³kendo ne giloko duong' mar Nyasaye maok tho e kido machalo gi dhano matho, gi winy, gi le ma tiende gi ang'wen, gi le mamol. ²⁴Mano emomiyo Nyasaye noweyogi mondo gidhi adhiya nyime gi kit chode duto ma chunyi ne gombo timo, ka giketho dendgi e kindgi ng'ato gi ng'ato. ²⁵Ne giloko adiera mar Nyasaye odoko miriambo kendo ne gilamo kendo gitiyone gik mochwe kar tiyo ne Jachwech, mipako nyaka chieng' Amin.

²⁶Kuom mano, Nyasaye noweyogi ne owruok gi kit gombo maricho duto make-lo kethruok. Koda ka mondgi bende noweyo riwore gi chwogi e yo mowinjore to negichako riwore gi mon wetegi. ²⁷Chwo bende noluwo mana yo machalre; kar riwruok gi mon e yo mowinjore to dendgi noowore gigombo chwo wetegi. Chwo notimo timbe dwanyruok gi chwo wetegi, ka gionge wichkuot, kendo timgino nomiyo giyudo kum e dendgi giwagi mowinjore gi kethogino. ²⁸To bende, kaka ne giparoni ng'eyo Nyasaye ok lich, Nyasaye noweyogi mondo gidhi adhiya nyime ka pachgi obam, mondo gitim, gik ma ok onego otim. ²⁹Gipong' gi kit timbe mamono duto gi richo gi wuoro kod timbe mobam. Bende gipong' gi ich lit, gi nek, dhawo, wuond, kod himruok. Gin jokuoth, ³⁰joketh nying ji, joma ochayo Nyasaye, jokwinyo joma wigi tek, lendo josunga giloso yore manyien mag timo richo; kendo ok giwinj jonywolgi; ³¹gionge paro gionge yie, gionge chuny, kendo gionge kech. ³²Kata obedo ni ging'eyo chik makare mar Nyasaye ni joma timo gik makamago onego otho, to gidhiyo adhiya nyime gi timogi, kendo bende gipwoyo joma timogi

Nyasaye Ng'ado Bura Makare

2 Omiyo in bende ok initory, in ming'ado bura ne ng'at machielo, nikech gima ing'adonego ng'at machielo burano ema bura loyigo iwuon, nikech in ming'ado bura bende itimo gik machalre gi gima otimo. ²To koro wang'eyo ni buch Nyasaye ne joma timo gik makamago oluwore gi adiera. ³Omiyo in dhano adhana ing'ado bura ne joma timo gik ma kamago, iparo ni Nyasaye biro ng'ado ne jogo bura to in, ma bende itimo gigo, to initory? ⁴Koso ichayo mwandu mar ng'wonone kod hooruokne gi kindane? Donge ing'eyo ni Nyasaye ng'wononi mondo oweni thuolo mar lokruok? ⁵To kuom tamruok mari kod chunyi midagi loko, ikuno mirima mager, ne in iwuon ne odiechieng mirimb Nyasaye, ma buche makare noelie. ⁶Chieng'no Nyasaye "nochul ng'ato ka ng'ato kaluwore gi timbene." ⁷Ne joma osetimo kinda kuom timo maber, ka gidwaro duong' kod luor, kod gik maok tho, enomi ngima mochwere. ⁸To joma dwaro margi kendgi, kendo maok lu adiera, to luwo mana timbe maok kare, norom gi mirima mager kod gero. ⁹Masira gi chandruok malit nobedi ne ji duto matimo richo, mokuongo ne jo-Yahudi eka bang'e ne Ogendini bende; ¹⁰to duong' gi luor kod kuwe nobed ni ji duto matimo maber, mokuongo ni jo-Yahudi, kendo ni Ogendini bende. ¹¹Nikech Nyasaye ok dew wang' ji. ¹²Ji duto matimo richo, ka gionge gi Chik, nolal bende ka gionge chik, to ji duto matimo richo ka gin e bwo Chik nong'adne bura gi Chik nogo. ¹³Nimar ok joma winjo Chik gi itgi ema nikare e nyim Nyasaye, to mana jogo, matimo gima Chik owacho, ema ibiro keto kare. ¹⁴(Chutho ka Ogendini maonge gi Chik, timo gik ma Chik dwaro, kata obedo ni gikia Chik, to gidoko chik negin giwegi kata obedo ni gionge gi chik kamano. ¹⁵nikech ginyiso ni gima Chik dwaro ondiki e chunyi, kendo kata chunyi giwegi bende bedo joneno ni mano en adier, kendo pachgi

seche moko ng'adonegi bura kaka joketho, to seche moko pwoyogi.) ¹⁶Mano notimre e odiechieng' ma Nyasaye nong'ad bura ne maling' ling' mag dhano kuom Kristo Yesu kaka Injili ma ayalo wacho.

Jo-Yahudi Kod Chik

¹⁷Koro in ka in iluogori ni ja Yahudi; ka iyiengori kuom Chik, kendo ipakori kuom winjruok ma in-go kod Nyasaye; ¹⁸ka ing'eyo dwarone, kendo inyalo pogo gima ber molooyo nikech isepounjori chik, ¹⁹Ka ing'eyo chuth ni in jatelo ne muofni, kendo ni in ler ne joma nie mudho; ²⁰bende ni in jatecho mar joma ofuwo, kendo ni in japuonj mar nyithindo mayom nikech Chik ma in go oting'o ng'eyo kod adiera ²¹koro, in mipuonjo joma moko, donge ipuonjrie in iwuon? In miyalo ni kuo rach, mit ki into ikwelo? ²²In miwacho ni ji kik terre, mit into iterori? In ma ichayo nyiseche manono, mit ki iyako ute milemoe? ²³In ma isungori nikech Chik ma in-go, dipo ikelo achaya ne Nyasaye kuom ketho Chik? ²⁴Mana kaka ondiki ni, "Nying Nyasaye iyanyo e dier Ogendini nikech un." ²⁵Tero nyangu nigi ohala mana ka imako Chik, to ka iketho Chik to ichalo ng'at mane ok oter nyangu. ²⁶Omiyo ka joma ok oter nyangu timo gik ma Chik dwaro to donge inyalo bi kwan-gi kaka joma oter nyangu? ²⁷Koro ng'at ma ok oter nyangu e yor ringruok, to oluwo chik, biro ng'adoni bura, in ma ingi Ndiko mar Chik kendo oteri nyangu to in jaketh chik. ²⁸Nikech ng'ato ok en ja-Yahudi mana kuom nenruokne maoko kata nikech otere nyangu e ringre maoko. ²⁹Ooyo, ng'ato en ja-Yahudi ka en kamano gi e chunye kendo tero nyangu mar adier en mar chuny, kuom Roho to ok mar chike mondiki. Ng'at ma kamano ok yud pak kuom ji, to oyudo pak kuom Nyasaye.

Adiera Mar Nyasaye

3 Kare ere ohand bedo ja-Yahudi kata ber tero nyangu? ²Nitie ber mang'e-ny! Mokuongo, gin emane omigi wechegi

mag Nyasaye. ³To kapo ni moko kuomgi neonge gi yie to? Bende bedogi maonge yie nyalo ketho adiera mar Nyasaye? ⁴Mano ok nyalre kata matin! Nyasaye nyaka sik jaadiera, to dhano ka dhano ja-miriambo. Mana kaka ondiki ni, "Mondo ibedi kare ka iwuoyo kendo ilocho kiyalo bura." ⁵To ka timbewa maricho konyo kuom guro tim makare mar Nyasaye, to dwawach ang'o? Dwawach ni Nyasaye timo marach kokumowa gi mirimbe mager? (Awuoyo kaka dhano.) ⁶Ok kamano ngang'! Nikech ka en kamano to Nyasaye ding'ad bura ne piny nade? ⁷Ng'ato nyalo penjo ni, "Ka miriambona nyalo miyo adiera mar Nyasaye medore, kendo duong'ne bende medo nyisore to marang'o pod ing'adona bura kaka jaricho?" ⁸Kare ang'o mono wacho (kaka osebed kiyanyowa ni wawacho, kendo kaka jomoko osiko ni wawacho) ni "Watimuru atima richo mondo eka ber obedie?" Joma kamago owinjore kumgi!

Onge Ng'ama Jaadiera

⁹Koro dwawach nang'o mogik? Bende waber adier? Ok kamano ngang'! Waseng'ado bura ni jo- Yahudi gi Ogendini joricho machalre. ¹⁰Mana kaka ondiki ni, "Onge ng'ama kare, bende onge kata achiel; ¹¹Onge ng'ama wach donjone, onge ng'ama dwaro Nyasaye. ¹²Ji duto oseruenyo, giduto gisedoko joma nono; onge ng'ama timo maber, onge kata achiel." ¹³"Dwondgi chalo liete moyawore; lewgi olony e wacho miriambo. "Sum mar thuond fu nie pien dhogi." ¹⁴"Dhogi opong' gi kuong' kod weche makech." ¹⁵"Tiendegi leng'ore ka dhi chuero remo; ¹⁶kethruok kod masira nie yore ma giluwu, ¹⁷kendo yor kuwe ok ging'eyo." ¹⁸"Luoro Nyasaye onge e wang'gi." ¹⁹To koro wang'eyo ni gimoro amora ma Chik wacho, owacho ne joma nie bwo chik, mondo dhok duto oling' thi, kendo buch Nyasaye olo piny duto. ²⁰Kuom mano, onge ng'ama noket kare e nyime kuom timo gik ma Chik owacho, to

kuom Chik ema dhano ng'eyoe kethone.

Bedo Makare E Yor Yie

²¹To koro yor ngima makare mar Nyasaye, maok otenore kuom chik, oseleore, mana kaka Ndiko mag Musa gi Jonabi nyiso. ²²Ngima makareni mar Nyasaye, yudore e yor yie kuom Yesu Kristo ne ji duto moyie. Onge pogruok; ²³nimar ji duto osekecho kendo girem kuom duong' mar Nyasaye, ²⁴to iketogi kare nono kuom ng'wonone, nikech waruok ma nobiro kuom Kristo Yesu, ²⁵Nyasaye nochiwe kaka misango magolo richo, nikech yie kuom rembe. Ne otimo ma mondo onyis timne makare, nikech e kinde motelo, Nyasaye noweyo mak okumo richo mane ji osetimo nikech kechne. ²⁶Notimo kamano mondo onyis ratiro e ndalagi ni en owuon en kare, kendo ni oketo kare joma nigi yie kuom Yesu. ²⁷To kare koro ng'aruok nikune? Ong'ad kare oko chuth. ogole gi yo mane? E yor timo gima chik dwaro? Ooyo, gi yor yie. ²⁸Nikech gima wang'eyo en ni ng'ato iketo kare kuom yie to ok kuom timo gik ma Chik dwaro. ²⁹Koso dibed ni Nyasaye en Nyasach jo-Yahudi kendgi? Donge en Nyasach Ogendini bende? Ee, en mar Ogendini bende, ³⁰nikech Nyasaye en achiel kende kendo obiro keto kare joma oter nyangu kuom yie, mana kaka otimo ne joma ok oter nyangu bende e yor yie achielno. ³¹Koro Chik bedo maonge tich nikech wach yie mwaloseni koso? Ok kamano ngang'! Kata kamano warito Chik.

Ibrahim Obedo Jaadiera Kuom Yie

4 To koro dwawach ang'o kuom Ibrahim ma kwarwa kuom ringruok; en to nowinjo tiend wachni nade? ²Nikech kaponi Ibrahim noket kare kuom tijene to dine obedo gi gima onyalo pakorego, to ok e nyim Nyasaye. ³Ndiko to wacho nang'o? Ibrahim noyie kuom Nyasaye, kendo mano nomiyo okwane ng'ama kare." ⁴To ong'ere malong'o ni chudo mimiyo ng'ato

bang' tich ok miye kaka mich; to imiye kaka gir luche mosetiyo. ⁵To kuom ng'at maok ti gimoro to oketo mana genone kuom Jal maketo jomaricho kare, yie ma kamano ikwano kaka tim makare.

⁶Daudi bende wuoyo kuom wachni koloso kuom hawi ma ng'ama Nyasaye kwano kaka ng'ama kare maok ti gimoro nigo ⁷Gin johawi jogo ma richogi owenegi, kendo ma richogi oum. ⁸En jahawi jalno ma Ruoth ok nokwanne richoge." ⁹To hawi miwuoyeni dobed mana mar joma oter nyangu kende, koso en mar joma ok oter nyangu bende? Wawacho ni yie mar Ibrahim nokwanne kaka tim makare"

¹⁰Ere kaka nokwan nego? Ne en kosetere nyangu koso ka podi? Ok ne en bang'e, to ne en kapok otere nyangu. ¹¹Ne oyudo kido mar nyangu achien kaka ranyisi mar bedo ng'ama kare, ma noseyudo motelo kuom yie kapok otere nyangu. Kuom mano en kwar ji duto moyie to ok oter nyangu, mondo joma kamago be oketgi kare. ¹²To bende en kwar joma oter nyangu, maok oter mana nyangu kende, to maluwo kit yie ma kwarwa Ibrahim ne nigo kane pok otere nyangu.

¹³Nikech singruok mane omi Ibrahim ni piny nobed mare, ne ok obirone kata ne kothe kuom chik, to nobiro kuom tim makare mar yie. ¹⁴Kapo ni joma oluwo Chik ema bedo jocham gikeni to yie obedo kayiem nono, kendo singruok onge tiende, ¹⁵nikech Chik kelo mirima. To kama Chik onge, ketho chik bende onge.

¹⁶Kuom mano, singruok biro kuom yie eka obedo kuom ng'wono, kendo nyikwa Ibrahim duto oyud singruokno, to ok ne joma rito chik kende to nyaka joma nigi yie machal gi mar Ibrahim. En e wuonwa waduto. ¹⁷Mana kaka ondiki ni, "Aseteki wuon ogendini mang'eny." En wuonwa e nyim wang' Nyasaye mane oyie kuome, Nyasaye machiwo ngima ni joma otho kendo maluongo gik maonge mana kagima gintie. ¹⁸Kata obedo ni gima dine mi Ibrahim bed gi geno ne onge, ne pod oyie ayiea ni nobiro bedo "wuon ogendini

mang'eny," mana kaka nosewachne ni, "kamano e kaka kothi nobed". ¹⁹Ne ok odok chien e yie, kata obedo ni ringre owuon ne chal gima otho (nikech hike ne romo kar mia achiel), kendo kata ni Sara ne migumba ma kinde minyuoloe nyithindo osekalo. ²⁰Kiawa moro amora ne ok omiyo okier oweyo singruok Nyasaye, to nomedo bedo motegno e yie mare komiyo Nyasaye duong', ²¹kendo noyie chutho ni Nyasaye ne nigi nyalo mar timo gima nosesingore ni notim. ²²Emomiyo yiene "ne okwan-ne kaka tim makare." ²³To weche mawacho ni, "ne okwan nego, " ne ondiki ok ni en kende, ²⁴to ne wan bende, ma Nyasaye biro ketonwa tim makare, wan mwayie kuom Jal mane ochiero Yesu Ruodhwa oa kuom joma otho. ²⁵En mane ochiwe mondo otho nikech richowa kendo nochiere mondo oketwa kare.

Kuwe Kod Mor

5 Emomiyo, kaka koro oseketwa kare kuom yie, wan gi kuwe gi Nyasaye kuom Ruodhwa Yesu Kristo, ²ma kuome waseyude kuom yie yor chopo e ng'wono makoro wachungoe. Bende wail kuom geno mar duong' mar Nyasaye. ³To ok mano kende, to wail bende kuom chandruok mwayudo, nikech wang'eyo ni chandruok kelo kinda, ⁴to kinda kelo kido maber to kido maber kelo geno. ⁵To geno ok kuod wiwa, nikech Nyasaye oseolo herane ei chunywa kuom Roho Maler, ma osemiyowa. ⁶Nikech, e kinde mowinjore, kane pod ok wanyal, to Kristo nothone wan joma richo. ⁷Ok en gima yot mondo ng'ato otho ni ng'at makare; dipo nono ng'ato ditho ni ng'at maber. ⁸To Nyasaye nyiso herane moherowago kama: Kane pod wan joricho to Kristo nothonwa. ⁹Kaka koro oseketwa kare kuom rembe, donge ibiro reswa chuth kendo moloyo e mirimb Nyasaye nikech En! ¹⁰Nikech kane pod wan wasik Nyasaye to ne oketowa osiepene kuom tho mar Wuode koro kaka osetimwa osiepene donge ibiro reswa moloyo nikech ngimane! ¹¹To ok

mano kende, wail bende kuom Nyasaye, nikech Ruodhwa Yesu Kristo, ma kuome oseketwa wabedo osiepe Nyasaye.

Tho Kuom Adam, Ngima Kuom Kristo

¹²Emomiyo mana kaka richo nodonjo e piny nikech ng'at achiel, kendo richono nokelo tho; e kaka tho nobiro kuom ji duto, nikech ji duto noketho, ¹³chutho richo ne nie piny kane pok Chik obetie. To richo ok kwan kaka richo ka Chik onge. ¹⁴Kata kamano tho nolocho chakre ndalo Adam nyaka ndalo Musa, kendo noloyo nyaka joma ne ok oketho kaka Adam, mane en kido mar Jal mane onego obi. ¹⁵To mich michiwo nono opogore gi bayo yo. Nikech ka ji mang'eny notho nikech bayo yo mar ng'at achiel, to nobedo maber manade ka ng'wono mar Nyasaye kod mich manobiro kuom ng'wono mar ng'at achielno, ma en Yesu Kristo, nochiw mogundho ni ji mang'eny. ¹⁶To bende mich Nyasaye opogore gi gima richo mar ng'at achiel nokelo. Nikech bura noluwo richo achiel mokelo kum, to mich ma nobiro bang' bayo yo kinde mang'eny nomiyo oketowa kare. ¹⁷Nikech ka bayo yo mar ng'at achiel nomiyo tho olocho kuom ng'at achiel nogo, koro joma yudo ng'wono mogundho kod mich mar ngima makare donge biro bedo gi loch mar ngima maduong' molooyo kuom ng'at achielno, ma en Yesu Kristo. ¹⁸Emomiyo mana kaka bayo yo mar ng'ato achiel nokelo kum ne ji duto, e kaka tim makare mar ng'at achielno miyo ji duto bedo makare kendo yudo ngima. ¹⁹Nikech kaka tamruok winjo wach mar ng'at achiel nomiyo ji mang'eny odoko joricho, e kaka winjo wach mar ng'at achielno biro miyo iketo ji mang'eny kare. ²⁰To Chik nomedi mondo bayo yo omedre. To kama richo nomedoree, ng'wono nomedoree molooyo, ²¹mondo kaka richo nobedo gi loch mokele tho, e kaka ng'wono bende obedie gi loch kuom tim makare, makelo ngima mochwere kuom Yesu Kristo Ruodhwa.

Tho Ne Richo, Bedo Mang'ima Ei Kristo

6 En ang'o ma koro wanyalo wacho? Dwadhi nyime ka watimo richo mondo eka ng'wono omedre? ²Gima kamano kik timre! Ne watho e richo; ere kaka wanyalo dhi nyime kwadak e iye? ³Koso donge ung'eyo ni wan duto mane obatiswa kuom Kristo Yesu, nobatiswa e thone? ⁴Omiyo noikwa kode e tho kuom batiso, mondo kaka Kristo nochier oa kuom joma otho kuom duong' mar Wuoro, e kaka wan bende onego wadagi e ngima manyien. ⁵Koseriwwa kode kamano e thone, to ochuno ni ibiro riwwa kode bende e chierne. ⁶Nimar wang'eyo ni dhandwa machon nogur kode mondo ringruok mar richo okethi, kendo kik koro wabed wasumbni mag richo. ⁷nikech ng'ato ang'ata mosetho osegony kuom richo. ⁸Koro ka wasetho gi Kristo, wan gi yie ni wabiro bedo mangima kode bende. ⁹Nimar wang'eyo ni kaka Kristo nochier oa kuom joma otho, ok onyal tho lendo, nikech tho koro onge gi loch kuome. ¹⁰Tho ma nothogo notho ne richo dichiel kendo mogik; to ngima ma ongimago, ongima ne Nyasaye. ¹¹E kaka un bende nyaka ukwanru ni utho ne richo, to ungi-ma ne Nyasaye ei Kristo Yesu. ¹²Emomiyo koro kik uyie mondo richo obed gi loch e ringreu matho ka uchopo gombone maricho. ¹³Kik uchiw fuonde ringreu ni richo kaka gik mikethogo, to chiwreuru ne Nyasaye kaka joma osegol e tho moter e ngima; kendo chiwneuru fuonde ringreu kaka gik mitimogo timbe makare. ¹⁴Nimar richo koro ok nobed gi loch kuomu, nikech koro ok un e bwo chik, to un e bwo ng'wono.

Wasumbini Ne Tim Makare

¹⁵To ang'o kendo? Dwatim atima richo nikech ok wan e bwo chik, to wan e bwo ng'wono? Gima kamano kik timre! ¹⁶Donge ung'eyo ni ka uchiworu ne ng'ato mondo uwinje kaka wasumbini to un

wasumbini mag jal muwinjono, bed ni un wasumbini mag richo, makelo tho, kata mag winjo wach, makelo ngima makare. ¹⁷To erokamano ne Nyasaye nikech kata obedo ni yande ne un wasumbini mag richo, to ne umako kit puonj mane omiu gi chunyu duto. ¹⁸Osegonyu e richo mi koro udoko wasumbini ne tim makare. ¹⁹Awacho ma e winjo mar dhano nilech uyomyom kaka dhano. Mana kaka yande chon ne uchiwo fuonde ringreu madoko wasumb timbe mochido, kendo ne richo mosiko medore ameda, e kaka koro owinjore uchiw fuonde ringreu obed wasumbini mag timbe makare makelo ngima maler. ²⁰Kane un wasumbini mag richo, ne un thuolo korka tim makare. ²¹En ohala mane mane uyudo e kindeno kuom gik makoro miyuo wichkuotgi? Giko mar gigo en tho! ²²To ka koro osegonyu kuom richo mi ubedo wasumbini mag Nyasaye, ohala muyudo kelo ngima maler ma gikone en ngima mochwere. ²³Nikech misach richo en tho, to mich ma Nyasaye chiwo en ngima mochwere kuom Kristo Yesu Ruodhwa.

Puonj Kuom Kend

7 Koso ukia, owetena, (nikech awuoyo gi joma ong'eyo chik), ni chik otweyo ng'ato mana ka pod ng'atno ngima? ²Kuom ranyisi, dhako mokendi Chik otweyo gi chwore mana ka chwore pod ngima; to ka chwore otho, to ogonye e chik moriwe gi chwore. ³Kamano bende, ibiro luong dhakono ni ochot ka odak gi dichwo machielo ka chwore pod ngima. To ka chwore otho, to ogonye kuom chikno kendo ka dichwo machielo okende to ok kwane kaka ochot. ⁴Kamano owetena, un bende, usetho korka chik kuom ringre Kristo, mondo koro ubed jo ng'at machielo, ma en Jal mosechier oa kuom joma otho, mondo eka wanyag olemo ne Nyasaye. ⁵Nimar kane pod ringruok chikowa, chik ne chiewo gombowa maricho, kendo ne gitiyoe dendwa, omiyo ne wanyag olemo makelo tho. ⁶To sani

nikech wasetho ne gima notweyowa chon, mondo wabed wasumbini, ok manie bwo chik machon mondiki, to manie ngima manyien.

Nyagrouk Gi Richo.

⁷Kare koro dwawach ang'o? Chik en richo koso? Ok kamano ngang'! Adiera dine ok ang'eyo gima richo en kane onge chik. Nimar bende dine ok ang'eyo gima chik en kane ok owacho ni, "Kik igombi gir wadu." ⁸To richo nokawo thuolo manie i chik mopidho kit gombo mayoreyore kuoma nimar ka chik onge to richo otho. ⁹Mokuongo kane chik onge, to ne angima angima, to ka Chik nobiro, to richo nochier, kuoma mi atho. ¹⁰Nanwang'o ni chik onogono, mane onego okel ngima, nolokore mokelo tho. ¹¹Nimar richo nokawo thuolo manie i chik, mowuonda, kendo okonyore gi chik nogo mondo onega. ¹²Omiyo Chik en gima ler, kendo buche Nyasaye bende ler, kendo ni kare, kendo ber. ¹³To dibed ni gima ber ema nolokrena tho? Ok kamano kata matin! To mondo richo ong'ere kaka richo, nokonyore gi gima ber mokelo tho kuoma, mondo eka onyisre kaka gima rach mokalo kare. ¹⁴Wang'eyo ni Chik en gir chuny; to an ng'at ringruok, kendo richo oseng'iewa moloka misumbane. ¹⁵Gik ma atimo odhiera ng'eyo. Nimar ok atim gik ma adwaro, to atimo mana gik ma achayo. ¹⁶Koro ka atimo gik maok adwar, to mano nyiso ni Chik ber. ¹⁷Chutho, an ok ema atim gino, to richo manie iya ema time. ¹⁸Ang'eyo ni onge gimoro kata achiel maber manie iya, tiende ni, kita mar richo. Nimar an-gi gombo mar timo gimaber to ok anyal time. ¹⁹Nimar ok atim gima ber ma adwaro mondo atim to asiko atimo mana gima rach, ²⁰Koro ka atimo gima ok adwar timo, to koro an ok ema atime, to richo modak e iya ema time. ²¹Omiyo uyudo chikni ka tiyo: ni ka adwaro timo gima ber, to apo ka rach bende osieko ni koda ²²Nimar gie chunya maiye amor gi

chik Nyasaye; ²³to aneno chik machielo e fuonde mag ringra makedo gi chik manie pacha, mamiyo abedo misumba Chik mar richo manie fuondega. ²⁴Mano kaka an ng'ama chandore! En ng'a mabiyo resa kuom ringruokni mar tho? ²⁵Erokamano ne Nyasaye kuom Yesu Kristo Ruodhwa! Kuom mano, an awuon gie i pacha an misumba mar chik Nyasaye, to kuom kita mar richo ringra, an misumba mar chik mar richo.

Ngima Kuom Roho

8 Emomiyo koro onge bura kuom joma ni ei Kristo Yesu, ²nikech kuom Kristo Yesu Chik mar Roho mar ngima osegonya kuom Chik mar richo kod tho. ³Nimar gima Chik ne ok nyal timo, nikech ringruok nomiye nyawo, Nyasaye notimo kuom oro Wuode owuon, e kit dhano ma jaricho mondo obed misango magolo richo. Osetimo kamano kuom ng'ado ne richo bura e ringruok, ⁴mondo eka dwaro makare mar Chik ochopi kare chuth kuomwa, wan ma wadak kaka Roho dwaro to ok kaka ringruok dwaro. ⁵Joma odak kaka ringruok dwaro oketo pachgi kuom gik ma ringruok dwaro to joma odak kaka Roho dwaro, oketo pachgi kuom Roho. ⁶Paro mar jaricho en tho, to paro ma Roho chiko kelo ngima kod kuwe ⁷Kuom mano, paro moket kuom ringruok mon-gi Nyasaye. Ok oyie bet e bwo loch mar chik Nyasaye, kendo ok onyal timo kamano. ⁸Joma kido mar richo chiko ok nyal moro Nyasaye. ⁹To kata kamano, un ok chiku gi kido mar richo, to Roho ema chikou, ka en adier ni Roho mar Nyasaye odak e iu. Kendo ka ng'ato onge gi Roho mar Kristo ok en ng'at Kristo. ¹⁰To ka Kristo nie iu, to kata obedo ni ringruok otho nikech richo, to chuny ngima nikech tim makare. ¹¹Ka Roho mar Jal mane ochiero Yesu oa kuom joma otho odak e iu, to En onogo mane ochiero Kristo oa kuom joma otho obiro chiwo ngima ni ringreu matho, bende kuom Roho modak e iu. ¹²Emomiyo wan jogowi, owetena, ok

ne kido mar richo to ni, mondo wadag kaka odwaro, ¹³Nimar ka idak kaka kido mar richo dwaro to ibiro tho; to ka kuom Roho, inego timbe maricho mag ringruok, to ibiro bedo mangima. ¹⁴nikech ji michiko gi Roho mar Nyasaye gin nyithind Nyasaye. ¹⁵Nimar ne ok uyudo chuny mamiyo udoko misumba mag luoro kendo, to ne uyudo chuny maketou nyithind ot. To Kuome waywak ni "Abba! Wuora!" ¹⁶To Roho owuon timo neno kaachiel gi chunywa ni wan nyithind Nyasaye. ¹⁷To ka wan nyithind ot, to mano nyiso ni wan jocham gikeni. Wan jocham gikeni mar Nyasaye kendo wan jocham gikeni kaachiel kod Kristo, ka dipo en adier ni wariwore kode e malit mage mondo eka wan bende obi omiwa duong' lode.

Duong' Mabiyo Achien

¹⁸To aneno ni malit mwaneno ndalogi tin maok dipim gi duong' mabiyo fwenyore kuomwa. ¹⁹Chwech duto rito gi geno chieng' ma nyithind Nyasaye nofwenyore. ²⁰Nimar chwech nodonjo e kethruok, ok nikech dwarone, to kuom dwaro mar Ng'at mane okete kamano, ka en gi geno ²¹ni, chwech bende ibiro gony e twech mar kethruok ma entie, mi kete e thuolo man gi duong' mar nyithind Nyasaye. ²²Wang'eyo ni chwech Nyasaye duto osebedo ka chur nyaka sani gi rem machal gi muoch malecho. ²³To ok mano kende, to kata wan wawegi ma wan gi olemo mokuongo mag Roho, wachur gie iwa ka pod warito gi siso maduong' mondo olokwa yawuot od Nyasaye, chieng' ma ringruok nowar. ²⁴Nimar geno machal kama emane oreswae. To geno mineno ok en geno ngang'. Koso en ng'a manyalo geno gima osebedogo? ²⁵To ka wageno gima pod waongego to warito gino gi kinda. ²⁶Kamano bende e kaka Roho konyowa e nyawowa. Wakia gima owinjore wakwa sama walamo to Roho owuon ema kwayonwa gi chur matut mokalo awacha. ²⁷To En monono chunjewa,

ong'eyo gima pach Roho en, nikech Roho kwayo ne joma ler kaluwore gi dwaro Nyasaye.

Joloch Maloyo Joloch

²⁸Bende wang'eyo ni e gik moko duto tiyo maber ne jogo mohere, jogo moselungi kaluwore gi dwarone. ²⁹Nimar joma ne Nyasaye ong'eyo chon ema bende ne owalo mondo okaw kit Wuode, eka mondo odok nyathi makayo e kind jowetene mang'eny. ³⁰To joma nowalogo bende ema noluongo; kendo joma noluongo noketo kare to joma noketo kare nomiyo duong' bende. ³¹Kare en ang'o ma dwawach kuom wachni? Ka Nyasaye ni korwa, en ng'a ma diked kodwa mi lowa? ³²Ka Wuode owuon ema ne ok okecho, to nochiwonwago wan duto, koro en ang'o ma dimone miyowa gik moko duto, kaachiel kode kuom ng'wonone? ³³En ng'a ma di ng'ad bura moro amora ne joma Nyasaye oseyiero? Nyasaye owuon ema keto ji kare. ³⁴En ng'a ma di ng'ad-nwa bura marach? Kristo Yesu emane otho, to bende ne ochiere odoko mangima mi koro obet e bat korachwich mar Nyasaye, kendo okwayonwa. ³⁵En ng'a manyalo pogowa gi hera mar Kristo? Dobed masira, koso chandruok, koso sand, koso kech, koso duk, koso gima rach, koso ligangla? ³⁶Mana kaka ondiki ni, "Nikech in, tho ochomowa odiechieng' duto "

ikwanowa kaka rombe midwa yang'o.

³⁷Ooyo, e gigi duto wan joloch ewi joloch nikech En ma noherowa. ³⁸Nimar an gi ratiro chuth ni tho kata ngima, kata malaike, kata jochiende, kata masani, kata gik mabiro, kata weg teko, ³⁹kata bor, kata tut, kata gima ochwe moro amora, ok nyal pogowa gi hera mar Nyasaye mane ei Kristo Yesu Ruodhwa.

Yier Nyasaye Makende

9 Awacho adiera kuom Kristo kendo ok ariambi. chunya bende siro wach ma

awachoni en adier kuom Roho Maler. ²An gi kuyo maduong' kod lit ma ok rum e chunya. ³Nimar daher mondo an awuon ema okuong'a kendo ong'ad kara oko kuom Kristo, nikech wach owetena awuon, kendo ogandana korka ringruok, ⁴ma gin jo Israel. Gin ema noketgi yawuot Nyasaye; gin ema nomigi duong' mar Nyasaye ma gin jood Nyasaye, mane omiyo duong', gi muma, gi chik, gi lemo, kod singruok. ⁵Gin bende ema kwerewa madongo noa kuomgi, kendo kata mana Kristo, kuom anyuolane kaka dhano, bende oa kuomgi; En ma en Nyasaye kuom duto, kendo mipako nyaka chieng'! Amin. ⁶Mano ok onyiso ni wach Nyasaye orem mak ochopo chenrone. Nimar jo-Israel duto ok gin jo-Israel madier. ⁷To bende, nyikwa Ibrahim duto ok gin kothe madier. To en mana kaka Nyasaye nonyiso Ibrahim ni, "kuom Isaka ema kothi ma hie nowuogie." ⁸Ma nyiso ni nyithind ringruok ok ema nyithind Nyasaye, to mana nyithind singruok ema ikwano kaka koth Ibrahim. ⁹Nimar kama e kaka singruok nowacho, "Ka kinde moketi ochopo to anaduogi kendo Sara noyud wuo wi." ¹⁰To ok mano kende; nyithind Rebeka bende ne nigi wuoro achiel machlre ma wuonwa Isaka. ¹¹To kapok nonyuolgi, kendo kapok ne gitimo gimoro maber kata marach, (mondo eka chenro Nyasaye mar yiero ochung' ¹²ok kuom tim, to kuom jal ma luongo ji ne onyise ni, "Wuowi maduong' noti ne wuowi matin." ¹³Mana kaka ondiki ni, "Jakobo nahero to Esau nachayo." ¹⁴Koro dwawach ang'o? Ni Nyasaye ok ni kare koso? Ok nyal bet kamano! ¹⁵Nimar owacho ne Musa ni, "Anakech ng'ama adwaro kecho, kendo anang'uon ne ng'ama adwaro ng'uonone." ¹⁶Omiyo ok otenore kuom dwaro kata tich mar ng'ato, to en kuom kech mar Nyasaye. ¹⁷Nimar Ndiko wacho ni Farao ni, "Aseting'i malo mana ne wachni, ni mondo anyis tekona kuomi kendo mondo nyinga olandi e piny duto. ¹⁸kuom mano, wayudo ni ka Nyasaye dwaro kecho ng'a-

to to okeche kendo ka odwaro miyo chuny ng'ato doko matek to otimo kamano. ¹⁹To nga'to kuomu nyalo nyisa ni, "Ka kamano to Nyasaye pod kwanowa kaka joketho nang'o? Koso en ng'a ma ditam dwarone timore? ²⁰To in, in ng'a yaye dhano, ma didwokri gi Nyasaye? Gima ochwe be diwachne ng'at mochweye ni, "Ang'o momiyo ne ichweya machal kama?"

²¹Donge jachue agulu nigi ratiro mar tiyo gi lop chuecho kaka ohero; kochueyo kode agulni moko ne tich mogen, to moko ne tich aticha mapile? ²²To ere rachne ka Nyasaye noyiere mar nyiso mirimbe, kendo mar nyiso ji tekone to osetimo kinda, kohore mos aming'a mak otoyoy mirimbe kuom joma owinjore okum, ma gin joma noik netho? ²³Donge dibed ni notimo kamano mondo omi mwandu mar duong'ne ong'e gi jogo modwaro kecho mane osechano chon ne duong'. ²⁴ma oriwo wan bende, wan moseluongowa, ok kuom jo-Yahudi kende, to kuom Ogendini bende? ²⁵Mana kaka owacho e Hosea ni, "Joma ne ok joga, abiro luongo ni jahere-na kendo jal mane ok oher abiro luongo ni 'moher'" ²⁶"kendo ni, "Biro bedo ni kanyono mane owachnegie, 'Ok un joga, ema noluong gie ni yawuot Nyasaye mangima. ²⁷Isaya bende noyiwagore kuom wach Israel kawacho ni, "Kata bed ni nyithind Israel ng'eny ka kwoyo mag nam, to mana joma odong' kuomgi kende ema nokuo. ²⁸Nimar Ruoth biro ng'ado bura ne piny ngima piyopiyo dichiel kendo mogik." ²⁹En mana kaka Isaya nowacho motelo ni "Ka dine Ruoth Manyalo Gik Moko Duto ok oweyowa kodhi to dine wachalo gi jo-Sodom, adier, dikoro wan kaka jo-Gomora."

Tamruok Yie Mar Israel

³⁰Koro dwawach ang'o? Ni Ogendini ma ok Jo-Israel mane ok otemo matek mondo oyud ngima ema koro oseyo ngima makare nogo miyudo kuom yie; ³¹to Israel mane otemo matek mondo oyud ngima makare motenore kuom Chik

to pok oyude. ³²Kamano nang'o? Nikech ne gidware ok kuom yie, to kuom yo machielo, ka giparo ni iyude kuom tich. Negichwanyore e kidi mar chwanyuok. ³³Mana kaka ondiki ni, "Ne, ayieyo kidi e Sayun mamiyo ji chwanyore, gi lwanda mamiyo gigore piny, to ng'at mogeno kuome wiye ok nokuod ng'ang.

10 Jowetena, gombo mar chunya gi gima alamoe Nyasaye ne jo Israel en ni mondo giyud waruok. ²Nimar anyalo timo nendgi ni giketo chunyi ne Nyasaye, to kata kamano chunyi ok giketo kuom ng'eyo. ³Nikech ne gikia ngima makare ma aa kuom Nyasaye, gisetemo keto margi giwegi, ka gidagi rwako yor Nyasaye moketogo ji kare. ⁴Kristo e giko mar Chik kendo en ema okelo ngima makare ne ji duto moyie. ⁵Musa lero kuom ngima makare maa kuom Chik kama: "Ng'at matimo gigi nobed mangima kuomgi." ⁶To ngima makare maa kuom yie to wacho ni, "Kik iwach e chunyi ni, En ng'a mabiro idho ei polo" (tiende ni, mondo olor Kristo piny), ⁷"kata ni 'En ng'a mabiro lor ei bur? (tiende ni, mondo ogol Kristo oko oa kuom joma otho). ⁸To owacho nang'o? Wach ni machiegni kodi, en e dhogi kendo e chunyi, (mano e wach yie mwaland; ⁹Ni ka ihulo gi dhogi ni "Yesu en Ruoth" kendo iyie ei chunyi ni Nyasaye nochiere oa kuom joma otho, to nowari. ¹⁰Nimar chunyi ema iyiegi mi keti kare kendo dhogi ema ihulogo mi wari. ¹¹Mana kaka Ndiko wacho ni, "Ng'ato ang'ata mogeno kuome ok nokuod wiye ngang'. ¹²Nimar onge pogruok e kind jo-Yahudi gi Ogendini; Ruoth en Ruoth machalre ne ji duto, kendo en gi mwandu mogundho mopogo ni ji duto maluongo nyinge, ¹³nimar, "Ng'ato ang'ata maluongo nying Ruoth nowar." ¹⁴To ere kaka digiluong Ng'at ma pok giyie kuome? Koso digiyie nadi kuom Ng'at mapok giwinjo kuome? To giniwinj kuome nadi kaonge ng'ama oyalonegi? ¹⁵To ere kaka digiyal wach kuome ka ok

oorgi? Mana kaka ondiki ni, "Mano kaka tiende joma kelo Wach Maber long'o!"¹⁶To jo Israel duto ok oserwako Wach Maberni. Nimar Isaya nowacho ni, "Ruoth, en ng'a moseyie wach mwalando?"¹⁷Kuom mano yie aa kuom wach miwinjo kendo wach miwinjono en wach Kristo.¹⁸To apenjo kama: Donge gisewinjo wach? Chutho, gisewinjo, nikech, "Dwongdi oshedhi e piny duto, kendo wehegi osetundo e tung' piny."¹⁹Apenjo kendo kama; Be Israel nowinjo tiend wach? Mokuongo, Musa wacho ni "Anami nyiego maku gi joma ok owinjore kwan ka oganda; anami mirima maku gi oganda maonge riek." ²⁰Isaya to loso gi chir ni, "Ne oyuda gi joma ne ok dwara. Ne afwenyorane joma ne ok penja." ²¹To kuom Israel to owacho ni, "Odiechieng' duto narieyo bedena ni joma ok winj wach kendo ma wigi tek. "

Jo-Israel Mane Otony

11 Koro apenjo ni, Ne Nyasaye okwedo jogo koso? Ooyo, ok kamano ngang! An awuon an ja Israel ma nyakwar Ibrahim, kendo ma ja dhood Benjamin. ²Nyasaye ne ok okwedo joge mane ong'eyo chakre chon. Donge ung'eyo gima Ndiko wacho kuom Elija, kaka noyuagore ni Nyasaye nikech wach jo-Israel: ³"Ruoth, gisenego jonabi magi kendo gisemuko kendege mag misango mi an kenda ema adong', to an bende gichano mar nega"? ⁴To Nyasaye nodwoke nang'o? "Asekano ne an awuon ji alufu abiriyo mapok ogoyo chonggi piny ne Baal." ⁵Kuom mano, kata sani bende pod nitie jomodong', moyier kuom ng'wono. ⁶To ka en kuom ng'wono, to mano nyiso ni koro ok yude kuom tich, nono to ng'wono koro ok dibed ng'wono. ⁷To nadi? Gima Israel ne manyo gi tekrene duto ne ok onwang'o to joma oyier ema noyude. Jomamoko duto chunygi nodoko matek, ⁸mana kaka ondiki ni, "Nyasaye nomiyogi chuny mar nindo matut gi wenge mondo kik ginen kod it mondo kik giwinj wach

nyaka sani." ⁹Daudi bende wacho ni : "Mad mesagi olokre negi rachwany gi ragaji, mad obednegi kidi mar chwanyruok kendo gima ichulogo kuor kuom timbegi maricho. ¹⁰Mad wengegi dinre mondo kik ginen, kendo dieng'egi osik kodolore nyaka chieng'."

Bede Yien Maok Ochwoji

¹¹Apenjo kendo ni: Dibed ni ne gipodho mokalo akonya koso? Ok kamano ngang! To nikech ketho mag-gi, warruok koro osebiro ne Ogendini mondo omi Israel obed gi nyiego. ¹²To ka kethogi kelo mwandu ne piny kamano kendo ka rem margi kelo mwandu ne Ogendini, to mano kaka warruok margi nobed mwandu maduong' molooyo manadi? ¹³To koro awuoyo kodu un Ogendini. Kaka an Jaote ne Ogendini, amiyo tichna duong', ¹⁴ka an gi genoni di ami ogandana awuon nyiego maki mi awar moko kuomgi. ¹⁵Nimar ka dagi mane Nyasaye odagigigi ema omiyo koro osiep obetie kind Nyasaye gi piny duto, donge rwakgi to nokel mana chier aa kuom joma otho? ¹⁶Ka bath mogo modwal ochiw kaka olemo mokuongo ler, to mano nyiso ni mogo modwal duto ler; kendo ka tiend yath ler, to bede yath bende ler. ¹⁷To ka bede yath moko nolwer oko, mondo un, ma un kaka yadh bungu, ochomu kargi, eka omi un bende ucham mwandu kaachiel kodgi koa e kor yadh Zeituni maduong', ¹⁸to kik usungru ne bede yathgo. Paraneuru wachni ni: "Un ok ema uchungo tiend yath, tiend yath ema ochungou. ¹⁹Inyalo wacho ni, "To donge nolwer bede yath moko oko mondo ochoma kargi?" ²⁰Mano en adier. To ng'eni nolwergo oko nikech ne gidagi yie, to un be uchung', mana kuom yie. Omiyo weuru pakoru to ubed moluor. ²¹Nimar ka Nyasaye ne ok okecho bede madier, to kata un ok obi weyou bende. ²²Kuom mano neye ng'wono kod gero mar Nyasaye: oger gi joma ne opodho, to onyiso ng'wonone ne un, to mana ka usiko e ng'wonone; nono to un bende ibiro

ng'adou oko. ²³To gin bende, ka ok gisiko e tamruok yie, to ibiro chomogi kendo, nimar Nyasaye nigi teko mar chomogi kendo. ²⁴To bende kata kane ong'adu kuom yiend Zeituni moti e bungu, ochomu e kor yadh Zeituni mopidhi, ma en gima ok timre pile e yo mayot to donge en gima yot molooyo mondo gin bede yath hie odog ochomgi e kor yadh Zeituni ma margi giwegi.

Jo Israel Duto Ibiro War

²⁵Owetena ok adwar ni ukia tiend wach moppondoni, adwaro ni uwinj tiend wach moppondoni mondo kik ukawru ni uriek molooyo kaka uchal: Jo Israel moko konchiel osemi chunyi odoko matek nyaka chop kar kwan mowinjore mar Ogendini odonji. ²⁶Kamano Israel duto ibiro war, mana kaka ondiki ni, "Jawar nobi koe Sayun; enoriemb richo kuom Jakobo." ²⁷"Kendo ma e singruokna kodgi, ka anagol richogi." ²⁸Korka Injili gin wasik Nyasaye, nikech un, to korka yiero to ohergi nikech kweregi ²⁹nimar mich Nyasaye kod luongne ok lokre. ³⁰Mana kaka un makinde moko ne ok uluro Nyasaye to koro osekechu nikech tamruok yie margi, ³¹e kaka gin bende sani ging'anyo, mondo kuom kech mosekechugo, gin bende koro okechgi. ³²Nimar Nyasaye osemiyo ji duto obedo joma otamore winje mondo eka okech ji duto.

Wend Pak

³³Yaye mano kaka mwandu gi rieko gi ng'eyo mar Nyasaye tut miwuoro! Mano kaka buchene oyombo parowa, kendo yorene fwenyo tek! ³⁴"E en ng'a mosen-g'eyo pach Ruoth? Kata en ng'a mosebedone jang'adne rieko?" ³⁵"En ng'a mosemiyo Nyasaye gimoro ma dobandh Nyasaye mondo ochule?" ³⁶Nimar gik moko duto oa kuome, kendo gintie nikech en, kendo gin mage duto. Duong' obed mare nyaka chieng! Amina.

Misango Mangima

12 Emomiyo, jowetena, ajiwou kuom ng'wono mar Nyasaye, mondo uchiw ringreu kaka misango mangima maler kendo ma Nyasaye morgo, nikech mano e yor lemo makare ²Kik koro ulu kit ngima pinyini, to lokreuru ka parou doko manyien pile, eka unubed gi nyalo mar pimo kendo ng'eyo dwach Nyasaye – dwache maber, mowinjore kendo mal-ong'o chuth. ³Nimar kuom ng'wono mosemiya, awacho ni ng'ato ka ng'ato kuomu ni: Kik ipar ni iduong' molooyo kaka ichal to ket pachi kare eka ing'ad buchi kaluwore gi kar rom yie ma Nyasaye osepogoni. ⁴Nikech mana kaka ng'ato ka ng'ato kuomwa nigi ringruok achiel man-gi fuonde mang'eny, to kendo fuondegi duto ok tim tich machalre, ⁵e kaka ei Kristo, waloso ringruok achiel, kata obedo ni wang'eny, kendo ng'ato ka ng'ato kuomwa nie achiel gi jowetene mamoko duto. ⁶Wan gi mich mopogore opogore kaluwore gi ng'wono momiwa. Ka mich ng'ato en koro wach to mondo oti kode kaluwore gi yie mare. ⁷Ka en tiy-one ji to mondo oti, ka en puonj to mondo opuonji. ⁸Ka en jipo, to mondo ojipi; ka en chiwo ne joma ochando, to mondo ochiw gi ng'wono; ka en telo, to mondo orit ji gi kinda; ka en kecho ji, to mondo otime komor.

Hera

⁹Hera nyaka bed madier. Sinuru gi timbe maricho; padreuru kuom gik mabe-yo. ¹⁰Genreuru ng'ato gi ng'ato gi hera mar owete. Ng'ato ka ng'ato mondo odhial nyawadgi molooyo kaka odhialore. ¹¹Kik uyie samuoyo nyosu, to neuru ni chunyu osiko kotegno, kutiyo ne Ruoth. ¹²Beduru mamor kuom geno, kutimo sinani e sand muyudo, kendo ulamo ma ok uywe. ¹³Poguru giu gi jo Nyasaye mochando. Beduru joma rwako welo. ¹⁴Gwedhuru joma sandou; gwedhgiuru agwedha, kik ukuong'gi. ¹⁵Moruru gi

joma mor, kendo ywaguru gi joma ywak.
¹⁶Daguru gi winjruok e kindu. Kik usungru, to beduru gi chuny mohero riwore gi joma nie ngima mapiny. Kik ng'ato ketre ni oriek moloyo ji mamoko. ¹⁷Kik uchul ng'ato ang'ata rach kar rach. Neuru ni utimo gima ji duto oyiegi ni ber. ¹⁸Ka nyaloro, to temuru mondo udag gi kwe gi ji duto. ¹⁹Osiepena, kik uchul kuor, to weuru thuolo ne mirimb Nyasaye, nimar ondiki ni, "Chulo kuor en mara; abiro chulo, " Ruoth owacho. ²⁰Ooyo, kar timo kamano "Ka jasiki odenyo, to miye chiemo; ka riyo oloye, to miye gimoro omodhi, kuom timo ma, ibiro olo makaa maliel e wiye." ²¹Kik uyie richo lou, to louru richo gi ber.

Winjo Jorit Loch

13 Ng'ato ka ng'ato nyaka winj joma nigi teko marito loch, nimar onge loch mantie, makmana mano ma Nyasaye ema oketo. Loch mantie duto Nyasaye ema oketo. ²Kuom mano, ng'ama otamore winjo jorit loch to otamore winjo gima Nyasaye ema oketo, kendo joma timo kamano biro yudo kum kuomgi giwegi. ³Nimar joloch ok ked gi joma timo maber makmana gi joma timo marach. Donge idwaro ni kik iluor joma orito loch? Kara tim gima kare to obiro pwoyi ⁴Nimar en jatich Nyasaye moketo mondo okonyi. To ka itimo marach to bed abeda maluor nikech ok oting' ligangla kayiem! En jatich Nyasaye machulo kuor gi mirima kokumo ng'ama timo marach. ⁵Kuom mano, owinjore mondo ng'ato ka ng'ato owinj jorit loch, ok mana nikech inyalo yudo kum kende, to bende nikech chunyi ok ne ni mano ber. ⁶Mano bende emomiyo uchulo osuru, nikech jorit loch gin jotich Nyasaye, kendo gichiwore ne tijn seche duto. ⁷Miuru ji duto gik makorgi monego umigi, joma onego uchul osuru; chuluru osuru; joma juogo chuluru pesa juok; joma onego uluor miuru, luor, kendo joma onego umi duong' miuru duong'.

Herruru, Giko Chiegni

⁸Kik ubed gi gop ng'ato, makmana gowi mar hera, nimar ng'ama ohero wadgi osechopo Chik. ⁹Chike mawacho ni, "kik iterri, kik ineki, kik ikwal, kik igombi, kaachiel gi chike mamoko duto, oriw e chik achielni, " "Her wadu kaka iherori iwuon." ¹⁰Hera ok tim marach ne wadgi Kuom mano, hera e chopo chik.

¹¹To timuru kamano ka uwinjo tiend gik matimore ndalogi. Saa osechopo mondo uchiew ua e nindo maru, nikech waruok marwa koro okayo machiegni moloyo chiegn' mane wayie mokuongo. ¹²Otieno chiegni rumo ru piny chiegni. Omiyo waweuuru timbe mag mudho, to wamanreuru gi gige lweny mag ler. ¹³Wadaguru e ngima mobidhore kaka joma ni e ler mar odiechieng', ka waweyo kit richo duto kaka, tugo e thum, mer, chode, anjawa, dhaw kod nyiegi. ¹⁴Kar timo kamano to rwakreuru gi Ruoth Yesu Kristo, kendo kik uchan e pachu kaka unyalo timo gik ma ringruok gombo.

Joma Yom Yom Gi Joma Otegno

14 Rwakuru ng'ama yie mare yom yom maok umino kode wach kuom weche matindo ma paro opogoree. ²Ng'ato nyalo bedo gi yie mar chamo chiemo moro amora, to ng'at machielo ma yiene yom yom chamo mana alot kende. ³Kik ng'at machamo gik moko duto buon ng'at maok cham, kendo ng'at maok cham gik moko duto bende kik ng'ad bura ne ng'at machamo, nikech Nyasaye oserwake. ⁴In to in ng'a ma inyalo ng'ado bura ne jatich ng'at machielo? Kochung' kata kopodho to obadho mana ruodhe owuon. To obiro mi ochung' nimar Ruoth nigi nyalo mar miyo ochung'. ⁵Ng'at achiel neno ni odiechieng' moro ler mohingo machielo; ng'at machielo to okaw odiechienge duto ni romre. Ng'ato ka ng'ato mondo obed gi ratiro e pache owuon. ⁶Ng'at mokawo odiechieng' moro ni duong' moloyo machielo timo kamano

mondo omi Ruoth duong'. Ng'at machamo ring'o bende chiamo kamiyo Ruoth duong', nikech ogoyo erokamano ne Nyasaye. Kamano bende, ng'at maok chiem be ok chiem kuom duong' mar Ruoth, kendo ogoyo erokamano ne Nyasaye. ⁷Nimar onge ng'ato kuomwa ma ngimane en mare owuon, kendo onge ng'ato kuomwa matho ne en owuon. ⁸Ka wangima to wangima ni Ruoth; kendo ka watho to bende watho ne Ruoth. ⁹Ma emomiyo Kristo notho mochako odoko mangima kendo mondo obed Ruodh joma ngima gi joma otho duto kaachiel. ¹⁰Koro ang'o momiyo in ing'ado bura ni nyawadu? Koso in ijaro nyawadu nang'o? Nimar wan duto wabiwo chung' e nyim kom bura mar Nyasaye. ¹¹Nikech ondiki ni, "Kaka angima, Ruoth owacho, chonge duto nogona piny kendo lep duto nowuo kuom Nyasaye." ¹²Omiyo ng'ato ka ng'ato kuomwa nodwok wach kuome owuon ne Nyasaye. ¹³Kuom mano, waweuru ng'ado ne jowetewa bura. Kar timo kamano to temuru matek mondo kik ng'ato kuomu oket rachwany kata rageng' e yor nyawadgi. ¹⁴Kaka ng'ama nie i Ruoth Yesu, ang'eyo malong'o ni onge chiamo maok ler kende owuon. To ka ng'ato okawo gimoro ni ok ler, to gino dokone maok ler ne en owuon. ¹⁵Kapo ni gima ichamo miyo nyawadu hinyoro, to mano nyiso ni iseweyo wuotho e hera. Kik iyie gima ichamo keth ng'at mane Kristo othone. ¹⁶Omiyo kik iyie mondo gima ikawo ni ber, ji wuoe kaka gima rach. ¹⁷Nimar pinyruodh Nyasaye ok en chiamo gi metho, to en ngima makare gi kuwe lod mor ei Roho Maler, ¹⁸nikech ng'ama tiyo ne Kristo e yo machal kama ema long'o ne Nyasaye, kendo ng'at ma kamano ema ji oyiego. ¹⁹Kuom mano, watemuru matek mondo watim kuwe kod gik mwanyalo gerorego ng'ato gi ng'ato. ²⁰Kik iketh tich Nyasaye nikech wach chiamo. Chiamo duto ler, ok ber mondo ng'ato ocham gimoro amora mamiyo ng'at machielo podho. ²¹Ok ber mondo icham ring'o kata

imadh divai, kata itim gimoro amora machielo manyalo miyo nyawadu podhi. ²²Omiyo gimoro amora ma iyie e chunyi ni ber kuom wehegi keti obedni maling'ling' e kindi gi Nyasaye. En jahawi, jalno ma chunye ok ng'adne bura kuom gima oparo ni ber. ²³To ng'at machiemo ka nigikiawa e chunye bura oloyo kapo ochiemo nikech ok ochiem kuom yie; to gik moko duto motim ka ok oa kuom yie en richo.

15 Wan joma otegnonego wating' nyawo mar joma yomyom maok watimo mana gik mamorowa wan wawegi. ²Ng'ato ka ng'ato kuomwa nyaka tim gik mamoro nyawadgi, ka en gi thorro maber mar gere. ³Nimar kata Kristo bende ne ok otimo gik mamore en owuon, to mana kaka ondiki: "Ayany duto mag joma yanyi nolwar kuoma." ⁴Nimar weche duto ma nondiki e ndalo machon, nondiki mondo opuonjwa, mondo kwachung' motegno kendo ka wajiwoke gi Ndiko, to wanyalo bedo gi geno. ⁵Mad Nyasaye mamiyo ji kinda kendo majiwo ji, omi ubed gi chuny achiel e kindu uwegi, kendo kuluwo Kristo Yesu, ⁶mondo ka un gi chuny achiel kendo uwacho gi chuny achiel kamano to umi Nyasaye ma wuon Ruodhwa Yesu Kristo duong'. ⁷Kuom mano, rwakuru jowetewu mana kaka Kristo bende norwakou mondo eka Nyasaye oyud pak. ⁸Nimar anyisou ni Kristo ose-doko jatich Jo-Yahudi mondo ochop adiera mar Nyasaye, ma en mondo omi singruok mane omi kwerewa otimre, ⁹kendo Ogendini omi Nyasaye duong' kuom kechne, mana kaka ondiki ni, "Emomiyo anapaki e kind Ogendini, kendo anawer wende mapako nyingi." ¹⁰Owacho kendo ni "Moruru un Ogendini, kaachiel gi joge, " ¹¹Kendo ni; "Pakuru Ruoth un Ogendini duto, ee ji duto mondo overne wende pak,"

¹²Isaya bende wacho ni: "Tiend yath

maka Jesse nowuogi mondo otel ni Ogendini duto, en ema Ogendini nogen kuome." ¹³Mad Nyasach geno opong'u gi mor kod kuwe mogundho ka ugeno kuome, mondo eka upong' gi geno motiak kuom teko mar Roho Maler.

Paulo Jatich E Kind Ogendini

¹⁴Jowetena, ang'eyo chuth ni un joma chuth opong' gi ber gi ng'eyo kendo ng'ato ka ng'ato kuomu nyalo puonjo nyawadgi. ¹⁵Kata kamano asendikonu kuom weche moko ka an gi chir mana mondo aparnugi, kendo kuom ng'wono ma Nyasaye omiya, ¹⁶mar bedo Jatich Kristo Yesu e kind Ogendini, ka atiyu tich dolo mar lando Injili Maber mar Nyasaye mondo eka ogendini obed misango maler ma Nyasaye oyiego kendo ma Roho Maler opwodho. ¹⁷Emomiyo ei Kristo Yesu anyalo sungora kuom tichna matiyu ni Nyasaye. ¹⁸To ok anyal hedhora mar wacho gimoro amora, makmana gigo ma Kristo osetimo kotiyo koda kuom loko Ogendini mondo oluor Nyasaye, kuom wechena gi timbena, ¹⁹kotiyo gi teko mar honni gi ranyisi kuom teko mar Roho Maler. Kamano aselworora e piny Jerusalem nyaka Iliriko, kalandu Injili mar Kristo adimba. ²⁰Aseketo chunya mondo ayal Injili kuonde ma ji pok ong'eyo Kristo, mondo kik agedi e wi mise ma ng'at machielo ema nochako. ²¹To mana kaka ondiki ni: "Jok mane pok onyis wach kuome none kendo jogo mapok owinjo kuome nowinj tiend wach." ²²Ma emomiyo asetemo dimang'eny mar biro iru to osetama.

Paulo Ochano Limo Rumi

²³To kaka koro onge kuonde modong' ma anyalo tiye e gwengegi, kendo nikech asebedo ka agombo nenou kuom higni mang'eny, ²⁴achano mar timo kamano kadhi Spania. Ageno mar limou ka abiro kadho gweng'u kanyo, mondo bang' bedo kodu moromo to ukonya e wudhano. ²⁵Sani to pod an e wudha adhi Jerusalem

mondo adhi akony jo maler man kuno. ²⁶Nimar jo Makedonia gi jo Akaya osechiwo kony gimor ne jomaler modhier man Jerusalem. ²⁷Ne gimor mar timo ma, to bende gisetimo mana gima owinjore gitim. Nimar owinjore mondo Ogendini, moseyudo konyruok mar chuny mar jo-Yahudi opog negie mwandun mag pinyini. ²⁸Omiyo ka asechopo wudhani, kendo ka aseneno ni giyudo olemoni to abiro dhi Spania, kendo ka akadho e wudhano to naraw alimu. ²⁹Ang'eyo ni ka abiro iru to anabi ka apong' gi gweth mar Kristo. ³⁰Owetena, ajiwou kuom Ruodhwa Yesu Kristo, kendo kuom hera mar Roho, mondo uriwru koda e nyagruokna, kulamona Nyasaye. ³¹Lamnauru mondo Nyasaye oresa e lwet joma odagi yie man Judea, kendo mondo jo maler man Jerusalem orwak tich ma atimo e diergi, ³²mondo ka Nyasaye oyie to abi iru ka amor kendo mondo ka an kodu to uduog chunya, to an bende aduog chuny. ³³Nyasach kuwe mondo obed kodu uduto. Amin!

Mos Mag Ji Giwegi

16 Apwoyonu nyaminwa Fibi, ma en jatich e kanisa man Kenkrea. ²Akwayou mondo urwake kuom Ruoth, kaka jomaler onego otim, kendo mondo umiye gimoro amora ma dodwar kuomu, nimar osebedo kokonyo ji mang'eny, nyaka an bende. ³Mosnauu Priska gi Akula, ma jotich koda kaachiel e Kristo Yesu. ⁴Ne giketo ngimagi e chandruok nikech an. Ok an kenda, to kanise duto mag Ogendini, bende pako tingino. ⁵Kanisa machokore e odgi bende mosnauu. Mosnauu Epaineto, osiepna mageno, ma en ema nokuongo bedo ja- Kristo e piny Asia. ⁶Mosnauu Maria, mosebedo katiyonwa matek ahinya e dieru. ⁷Androniko kod Junias, ma wedena, kendo mane ni koda e jela, bende mosnauu. Ji ariyogi ochung' moyangore e kind Joote, kendo ne gikwongona yie kuom Kristo. ⁸Mosnauu Ampliato ma jaherana kuom

Ruoth. ⁹Urbano, ma en jatich Kristo wadwa, kod Stakis ma osiepna mageno bende mosnauru. ¹⁰Mosnauru Apele, ng'at mosetem moyud ni ja Kristo maradier. Jood Aristobulo bende mosnauru. ¹¹Mosnauru watna ma Herodian, kod jood Narkiso, mohero Ruoth. ¹²Mosnauru Turfena gi Turfosa, ma gin joma tiyo matek ne Ruoth; kod Persi, joherana mosetiyo matek ahinya ne Ruoth, bende mosnauru. ¹³Mosnauru Rufus, ng'at ma Ruoth oyiero kod min-gi mosebedona kaka minwa an bende. ¹⁴Mosnauru bende Asunkrito, Flegon, Herme, Patroba, Herma, kod Jowete duto man kodgi. ¹⁵Filologo gi Julia gi Nerea kod nyamin mare; gi Olumpa kod jomaler duto man kodgi, be mosnauru. ¹⁶Mosreuru, uduto ng'ato gi ng'ato, gi yogruok maler. Kanise duto mag Kristo omosou.

¹⁷Ajiwou, owetena, mondo ung'i maber joma kelo pogruok, kendo keto chwanyruok e yoreu maok oluwore gi puonj museyudo. Wereuru kodgi. ¹⁸Nimar joma kamago ok ti ne Kristo Ruodhwa, to gitiyo mana ne igi giwegi. Giwuoyo gi weche mayom ka giolo ji mondo giwuond chunje joma pachgi thany thany. ¹⁹Ji duto osewinjo kaka

uwinjo wach kendo mano omiyo chunya opong' gi mor kuomu, to adwaro mondo ubed mariek korka timo gima ber, kendo ubed maonge wach korka timo gima rach. ²⁰Piyopiyo nono Nyasach kuwe biro toyo Satan e bwo tiendu. Mad ng'wono mar Ruodhwa Yesu Kristo obed kodu. ²¹Timotheo, mwatiyogo kaachiel okowonu mos; Lukio gi Jason kod Sosipatro ma wedena bende jomosou. ²²An Tertio, ma jandiko mar baruwani, bende amosou kuom Ruoth. ²³Gayo, moserwaka e ode, kaachiel gi kanisa duto, omosou. Erasto, jakeno maduong' mar dalani, kod o wadwa Kwarto bende kowonu mos. ²⁴Mad ng'wono mar Ruodhwa Yesu Kristo obed kodu uduto. Amin. ²⁵Mad ne en manyalo miyo uchung motegno kaluwore gi Injili mara kod lando Yesu Kristo obed kaluwore gi fweny mar gik mosepandi kuom higin mang'eny mosekalo, ²⁶to koro oseelgi kendo osemi ji ong'eyogi kaluwore gi Ndiko mag Jonabi, mana kaka Nyasaye mochwere nochiko, mondo Ogendini duto oyie kuome kendo owinje. ²⁷Duong' obed ne Nyasaye achiel kende mariek nyaka chieng' kuom Yesu Kristo! Amin.